

গণপ্রজাতন্ত্রী বাংলাদেশ সরকার
জাতীয় রাজস্ব বোর্ড
ঢাকা।

[মূল্য সংযোজন কর]

প্রজ্ঞাপন

তারিখ: ৩০ জ্যৈষ্ঠ, ১৪২৬ বঙ্গাব্দ / ১৩ জুন, ২০১৯ খ্রিস্টাব্দ

এস.আর.ও. নং-২০২-আইন/২০১৯/৫৯-মুসক।—মূল্য সংযোজন কর ও সম্পূরক শুল্ক আইন, ২০১২ (২০১২ সনের ৪৭ নং আইন) এর ধারা ১৩৫, ধারা ১৩০ এর সহিত পঠিতব্য, এ প্রদত্ত ক্ষমতাবলে মুসক পরামর্শক লাইসেন্স প্রদানের নিমিত্তে জাতীয় রাজস্ব বোর্ড নিম্নরূপ বিধিমালা প্রণয়ন করিল, যথা:—

১। সংক্ষিপ্ত শিরোনাম।— এই বিধিমালা মুসক পরামর্শক লাইসেন্সিং বিধিমালা, ২০১৯ নামে অভিহিত হইবে।

২। সংজ্ঞা।—বিষয় বা প্রসঙ্গের পরিপন্থী কোনো কিছু না থাকিলে, এই বিধিমালায়—

- (ক) “অপরাধ” অর্থ মূল্য সংযোজন কর ও সম্পূরক শুল্ক আইন, ২০১২ এবং মূল্য সংযোজন কর ও সম্পূরক শুল্ক বিধিমালা, ২০১৬ এর সহিত সঙ্গতিপূর্ণ নয়, এমন যে কোন কার্যক্রম বা আচরণ;
- (খ) “আইন” অর্থ মূল্য সংযোজন কর ও সম্পূরক শুল্ক আইন, ২০১২ (২০১২ সনের ৪৭ নং আইন);
- (গ) “একাডেমি” অর্থ কাস্টমস, এক্সাইজ ও ভ্যাট ট্রেনিং একাডেমি, চট্টগ্রাম;
- (ঘ) “বিধি” অর্থ মূল্য সংযোজন কর ও সম্পূরক শুল্ক বিধিমালা, ২০১৬;
- (ঙ) “মহাপরিচালক” অর্থ কাস্টমস, এক্সাইজ ও ভ্যাট ট্রেনিং একাডেমি, চট্টগ্রাম এর দায়িত্বপ্রাপ্ত মহাপরিচালক।

৩। মুসক পরামর্শক লাইসেন্সের জন্য আবেদনকারীর যোগ্যতা ও অযোগ্যতা।—

(১) মুসক পরামর্শক লাইসেন্স প্রাপ্তির জন্য আবেদনকারীর নিম্নবর্ণিত যোগ্যতা থাকিতে হইবে, যথা:—

- (ক) বাংলাদেশের নাগরিক হইতে হইবে;
- (খ) আবেদনের তারিখে বয়স অন্ত্যন ২৫ (পঁচিশ) বৎসর হইতে হইবে;
- (গ) কোনো স্বীকৃত বিশ্ববিদ্যালয় হইতে যেকোনো বিষয়ে স্নাতক বা সমমানের ডিগ্রিধারী হইতে হইবে;

- (ঘ) মূসক নিবন্ধিত হইতে হইবে; এবং
- (ঙ) মূল্য সংযোজন কর বিভাগে জাতীয় বেতন স্কেলের ৮ম গ্রেডের নিম্নে নহেন এমন পদে ন্যূনতম ৫ (পাঁচ) বৎসর কাজ করিবার অভিজ্ঞতা সম্পন্ন অবসরপ্রাপ্ত কর্মকর্তাগণকে পরীক্ষায় অংশগ্রহণ ব্যতীত আবেদন যথাযথ প্রাপ্তি সাপেক্ষে মূসক পরামর্শক লাইসেন্স প্রদান করা যাইবে।

(২) নিম্নবর্ণিত যেকোনো ব্যক্তি মূসক পরামর্শক লাইসেন্স প্রাপ্তির জন্য অযোগ্য বলিয়া বিবেচিত হইবেন, যথা:—

- (ক) সরকারি, আধা-সরকারি, স্বায়ত্বশাসিত বা স্থানীয় কর্তৃপক্ষের অধীনে চাকুরি হইতে অপসারিত, বরখাস্তকৃত বা বাধ্যতামূলকভাবে অবসরপ্রাপ্ত কোনো ব্যক্তি;
- (খ) ফৌজদারি অপরাধে সাজাপ্রাপ্ত কোনো ব্যক্তি যাহার সাজা ভোগ শেষ হইবার পর ৫ (পাঁচ) বৎসর সময় অতিবাহিত হয় নাই; এবং
- (গ) ইতঃপূর্বে যাহার মূসক পরামর্শক, ক্লিয়ারিং ও ফরোয়ার্ডিং, ফ্রেইট ফরোয়ার্ডার্স, কুরিয়ার সার্ভিস এজেন্ট, শিপিং এজেন্ট বা আয়কর পরামর্শকের (Income Tax Practitioner) লাইসেন্স বাতিল করা হইয়াছে এমন কোনো ব্যক্তি।

৪। **আবেদন ও প্রয়োজনীয় দলিলাদি।—**(১) বিধি ৩ এ উল্লিখিত যোগ্যতাসম্পন্ন যেকোনো ব্যক্তি বিধির “ফরম ১৮.১” এ বোর্ডের নিকট আবেদন করিতে পারিবেন।

- (২) উক্ত আবেদনপত্রের সহিত নিম্নবর্ণিত দলিলাদি সংযুক্ত করিতে হইবে, যথা:—
 - (ক) বয়স নির্ধারণের জন্য এসএসসি বা সমমানের পরীক্ষার সত্যায়িত সনদ;
 - (খ) আবেদনকারীর সাম্প্রতিক সময়ের ৩ (তিন) কপি পাসপোর্ট সাইজের সত্যায়িত রঞ্জিন ছবি;
 - (গ) সর্বোচ্চ শিক্ষাগত যোগ্যতা বা প্রযোজ্য ক্ষেত্রে, অভিজ্ঞতার সনদের সত্যায়িত কপি;
 - (ঘ) জাতীয় পরিচয় পত্রের সত্যায়িত কপি; এবং
 - (ঙ) মহাপরিচালক, কাস্টমস, এক্সাইজ ও ভ্যাট ট্রেনিং একাডেমির অনুকূলে পরীক্ষার ফি বাবদ ১০,০০০/- (দশ হাজার টাকা) মূল্যমানের পে-অর্ডার।

৫। **মূসক পরামর্শক লাইসেন্সের মেয়াদ এবং নবায়ন।—** (১) মূসক পরামর্শক লাইসেন্সের মেয়াদ হইবে উহা প্রদানের তারিখ হইতে ৫ (পাঁচ) বৎসর।

(২) মহাপরিচালক, কাস্টমস, এক্সাইজ ও ভ্যাট ট্রেনিং একাডেমি প্রতি বৎসর এক বা একাধিকবার ১০০০/- (এক হাজার টাকা) ফি এর বিনিময়ে মূসক পরামর্শক লাইসেন্সধারীদের জন্য মূল্যায়ন পরীক্ষার ব্যবস্থা করিবেন।

৬। **আবেদন প্রক্রিয়াকরণ।**-(১) বিধির ফরম “মূসক-১৮.১” এ আবেদনকারী সদস্য বরাবর আবেদন করিবে।

(২) অর্ধ-বার্ষিক ভিত্তিতে প্রাপ্ত সমুদয় আবেদনপত্র প্রাথমিক বাছাইয়ের জন্য বোর্ড, মহাপরিচালক সমীপে প্রেরণ করিবে এবং একাডেমি যোগ্য প্রার্থীদের তালিকা ওয়েব সাইটে প্রকাশ করিবে।

(৩) মহাপরিচালক প্রতি বছর জানুয়ারি-জুন মেয়াদে প্রাপ্ত আবেদনের ভিত্তিতে আগস্ট বা সেপ্টেম্বর মাসে এবং জুলাই-ডিসেম্বর মেয়াদে প্রাপ্ত আবেদনের ভিত্তিতে ফেব্রুয়ারি বা মার্চ মাসে পরীক্ষা গ্রহণ করিবেন।

(৪) মহাপরিচালক ১৫ (পনের) দিনের মধ্যে ফলাফল প্রকাশ করিবেন এবং যোগ্য প্রার্থীদের একটি তালিকা বোর্ডে প্রেরণ করিবেন।

(৫) বোর্ড প্রাপ্ত তালিকা অনুযায়ী বিধির ফরম “মূসক-১৮.১ক” এ মূসক পরামর্শক লাইসেন্স প্রদান করিবেন।

৭। **পরীক্ষা পরিচালনা কমিটি।**-পরীক্ষা অনুষ্ঠানের নিমিত্তে মহাপরিচালক, একাডেমিতে নিম্নরূপ একটি পরীক্ষা পরিচালনা কমিটি গঠন করিবেন, যথা:-

ক্রমিক নং	কর্মকর্তার পদবী	কমিটিতে অবস্থান
০১.	একাডেমির একজন যুগ্ম/অতিরিক্ত মহাপরিচালক	আহ্বায়ক
০২.	কাস্টম হাউস, চট্টগ্রাম এর সহকারী/উপ কমিশনার পদমর্যাদার একজন কর্মকর্তা	সদস্য
০৩.	কাস্টমস, এক্সাইজ ও ভ্যাট কমিশনারেট, চট্টগ্রাম এর সহকারী/উপ কমিশনার কমিশনার পদমর্যাদার একজন কর্মকর্তা	সদস্য
০৪.	একাডেমির একজন সহকারি বা উপ পরিচালক	সদস্য সচিব

৮। **ইনভিজিলেটর, উত্তরপত্র, পরীক্ষক ইত্যাদি।**-মহাপরিচালক, কমিটি গঠন করিয়া উহার কার্যপরিধি নির্ধারণ করিবেন এবং পরীক্ষা গ্রহণের সার্বিক প্রস্তুতি গ্রহণ করিবেন।

৯। **পরীক্ষার সিলেবাস।**-পরীক্ষার সিলেবাস নিম্নরূপ হইবে, যথা:-

ক্রমিক	বিষয়	নম্বর
(ক)	মূল্য সংযোজন কর ও সম্পূরক শুল্ক আইন, ২০১২	৪০
(খ)	মূল্য সংযোজন কর ও সম্পূরক শুল্ক বিধিমালা, ২০১৬	
(গ)	উক্ত আইন ও বিধিসমূহের অধীন জারিকৃত প্রজ্ঞাপন ও আদেশসমূহ	
(ঘ)	সাধারণ গণিত	১০

(ঙ)	বাংলা ও ইংরেজি	১০
(চ)	Customs Act, 1969	২৫
(ছ)	আমদানি নীতি আদেশ (যখন যেই আদেশ বলবৎ থাকিবে)	১৫
(জ)	রপ্তানি নীতি আদেশ (যখন যেই আদেশ বলবৎ থাকিবে)	
(ঝ)	The Foreign Exchange Regulations Act, 1947	
(ঞ)	The Import and Export (Control) Act, 1950	

(২) তিনঘন্টা সময়ে পরীক্ষা অনুষ্ঠিত হইবে এবং জাতীয় রাজস্ব বোর্ডের ভিন্নরূপ কোনো নির্দেশনা না থাকিলে মহাপরিচালক, তাহার নিজস্ব পদ্ধতি ও ব্যবস্থাপনায় প্রশ্নপত্র প্রণয়ন করিতে পারিবেন।

১০। **মৌখিক পরীক্ষা।**— মৌখিক পরীক্ষা ৫০ (পঞ্চাশ) নম্বরের হইবে। একাডেমির মহাপরিচালক ৩ হইতে ৫ জন সদস্যবিশিষ্ট একটি মৌখিক পরীক্ষার বোর্ড গঠন করিবেন। মহাপরিচালক উক্ত বোর্ডের সভাপতির দায়িত্ব পালন করিবেন। একাধিক মৌখিক পরীক্ষার বোর্ড গঠন করিবার প্রয়োজন হইলে মহাপরিচালক উক্তরূপে বোর্ড গঠন করিয়া জাতীয় রাজস্ব বোর্ডকে অবহিত করিবেন। সেইক্ষেত্রে কাস্টমস, এক্সাইজ ও ভ্যাট কমিশনারেট চট্টগ্রাম; কাস্টমস, এক্সাইজ ও ভ্যাট কমিশনারেট, কুমিল্লা; কাস্টমস বন্ড কমিশনারেট, চট্টগ্রাম; কাস্টম হাউস, চট্টগ্রাম অথবা কাস্টমস, এক্সাইজ ও ভ্যাট (আপিল) কমিশনারেট, চট্টগ্রাম এর কমিশনারকে প্রতিটি কমিটির আহ্বায়ক হিসাবে দায়িত্ব প্রদান করা যাইবে।

১১। **ফলাফল।**— লিখিত এবং মৌখিক উভয় পরীক্ষায় পৃথকভাবে ন্যূনতম ৫০ শতাংশ নম্বর পরীক্ষায় উত্তীর্ণের মান হিসাবে বিবেচিত হইবে।

১২। **লাইসেন্স ইস্যু।**— মহাপরিচালক উত্তীর্ণ প্রার্থীগণকে বা এই বিধিমালার বিধি ৩ এর দফা (ঙ) অনুযায়ী আবেদনকারীকে ৫ (পাঁচ) বৎসর মেয়াদের জন্য যথাযথ নিরাপত্তা বৈশিষ্ট্য সংবলিত ডিজিটাল কার্ডে মূসক পরামর্শক লাইসেন্স প্রদান করিবেন, যাহাতে নিম্নবর্ণিত তথ্যাদিও উল্লেখ থাকিবে, যথা:—

- (ক) লাইসেন্সধারীর নাম, ছবি, জন্ম তারিখ, রক্তের গ্রুপ, জাতীয় পরিচয়পত্র নম্বর ও নমুনা স্বাক্ষর;
- (খ) লাইসেন্স ইস্যুর ও মেয়াদ উত্তীর্ণের তারিখ; এবং
- (গ) লাইসেন্স প্রদানকারী কর্মকর্তার স্বাক্ষর, নাম ও পদবি।

১৩। **লাইসেন্স নবায়ন।**— (১) লাইসেন্সের মেয়াদ উত্তীর্ণ হইবার ৬০ (ষাট) দিন পূর্বে নবায়ন ফি বাবদ ১ (এক) হাজার টাকা ট্রেজারি চালানোর মাধ্যমে জমা প্রদান করিতে হইবে। স্বহস্তে লিখিত নবায়ন আবেদনের সহিত সম্পাদিত কার্যক্রমের সংক্ষেপ সংযুক্ত করিতে হইবে।

(২) মহাপরিচালক আবেদন প্রাপ্তির ৭ (সাত) কার্যদিবসের মধ্যে নবায়ন করিবেন।

১৪। **মূসক পরামর্শকের দায়িত্ব।**— মূসক পরামর্শকের দায়িত্ব হইবে নিম্নরূপ, যথা:—

(১) লাইসেন্সপ্রাপ্ত প্রত্যক মূসক পরামর্শককে মূসকের আওতায় নিবন্ধিত হইতে হইবে এবং তাহার প্রদত্ত সেবার বিপরীতে যথাযথভাবে মূসক প্রদানসহ আইনের অন্যান্য বিধানাবলী পরিপালন করিতে হইবে;

(২) প্রত্যেক মূসক পরামর্শক আইন ও বিধি অনুসারে মূল্য সংযোজন কর এবং সংশ্লিষ্ট অন্যান্য বিষয়ে যথাসম্ভব সততা ও নিষ্ঠার সহিত তাহার দায়িত্ব পালন করিবেন;

(৩) তাহার দায়িত্বের সূত্রে ইচ্ছাকৃতভাবে কোনো কর্তৃপক্ষের বা কোনো ব্যক্তির নিকট অসত্য বা বিকৃত তথ্য সরবরাহ করিবেন না বা ইচ্ছাকৃতভাবে কোনো প্রয়োজনীয় তথ্য গোপন করিবেন না বা অনুরূপ পরামর্শ প্রদান করিবেন না।

১৫। **মূসক পরামর্শকের অপরাধ ও দণ্ড।—** (১) এই বিধির বিধান লংঘন মূসক পরামর্শকের জন্য দণ্ডনীয় অপরাধ হইবে। অপরাধ উল্লেখপূর্বক সংশ্লিষ্ট কমিশনার আইনানুগ কার্যক্রম গ্রহণের লক্ষ্যে মহাপরিচালক সমীপে অভিযোগ পত্র প্রেরণ করিবেন। মহাপরিচালক অভিযোগ পত্র পর্যালোচনা করিয়া আইনানুগ শাস্তি প্রদান করিতে পারিবেন। তবে, জাল দলিল উপস্থাপন বা মিথ্যা তথ্য প্রদান বা মূসক ফাঁকির সহিত প্রত্যক্ষ বা পরোক্ষভাবে জড়িত থাকলে মূসক পরামর্শক লাইসেন্স প্রাথমিকভাবে স্থগিত করিয়া শুনানী গ্রহণপূর্বক বাতিল করা যাইবে। অধিকন্তু, মূসক পরামর্শককে ৫০ (পঞ্চাশ) হাজার টাকা থেকে ১ (এক) লক্ষ টাকা পর্যন্ত অর্থদণ্ড প্রদান করা যাইবে।

(২) মূসক পরামর্শক কর্তৃক দাখিলপত্র প্রদানে ব্যর্থতায় ধারা ৮৫ এর উপ-ধারা (১) এর সারণীর দফা (ছ) মোতাবেক জরিমানা আরোপ করা যাইবে।

১৫। **ন্যায় নির্ণয়।—** কোন নিবন্ধিত করদাতা আইনের কোন বিধান লঙ্ঘন করিলে ন্যায় নির্ণয় যেইভাবে সম্পাদিত হইবে সেই একই প্রক্রিয়া মূসক পরামর্শকের ক্ষেত্রেও প্রযোজ্য হইবে।

১৬। **রহিতকরণ।—**জাতীয় রাজস্ব বোর্ডের এসআরও নং ১১৭-আইন/৯৮/১৭৮-মূসক, তারিখ: ১১ জুন, ১৯৯৮ খ্রিঃ এর মাধ্যমে জারিকৃত মূল্য সংযোজন কর পরামর্শক (লাইসেন্স) বিধিমালা, ১৯৯৮ এবং সাধারণ আদেশ নং ০৭/মূসক/৯৯, তারিখ: ২২ এপ্রিল, ১৯৯৯ খ্রিঃ এর মাধ্যমে জারিকৃত মূল্য সংযোজন কর পরামর্শক (লাইসেন্স) বিধিমালা, ১৯৯৮ এর অধীনে কর পরামর্শক নিয়োগ পদ্ধতি এতদ্বারা রহিত করা হইল এবং উক্তরূপ রহিতকরণ সত্ত্বেও উক্ত বিধিমালা বা আদেশ এর অধীন প্রদত্ত মূসক পরামর্শক লাইসেন্স এমনভাবে কার্যকর থাকিবে যেন উহা বিধিমালার অধীন প্রদত্ত হইয়াছে।

জাতীয় রাজস্ব বোর্ডের আদেশক্রমে,

হাছান মুহম্মদ তারেক রিকাবদার
প্রথম সচিব (মূসক নীতি)